



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : [Tir Yimyim](#) [tir_yimyim](#)

[tir yimyim](#) TAPAK 8

Pakistan-i amaktsü aliba tasa
India-i raksatsü: Shehzad Sharif

Bayern-i Leverkusen nungi
Tah anisemogo

VOL. XXII ISSUE NO. 225 (ADOK 225) DIMAPUR ROGONÜ (FRIDAY)

MONUPII (MAY) 30, 2025

₹ 5.00

NSCN-K (Khango) nungi Angami nungerajakatsünginogo

Kohima, Monupii/May 29 (TYO): Angami Youth Organisation (AYO) aser NSCN/GPRN (K) Khango faction na mangatetep adoker aliba mapang AYO-i sangdong ka ajanga iba telok nung densema aliba Angami nunger national workers 18 prongla officially atsünginba metedaktsüogo.

Ita 10 shi lir item züngsemtem atsünginba ajanga lokti temulung masüba aser AYO indang Non-Cooperation Movement ajang ajanga aoba sayur.

August 20 nü senden ka amena mapang lena kar nungbo tangatetep dangi aruaka AYO-i iba inyakyim ya maneni benoka inyaktsü ta sangdonga liasü. Iba senden ya Ceasefire Monitoring Board (CFMB)-i achaayanga Hotel Japfü, Kohima nung mena liasü.

Kuli tongtibangbaji NSCN-K Khango teloki yimjak nung aibelenba nangzüka nisung ka tenüng agi "Max Naga" anema jenjang magiba ya lir.

"Tang tashi nung kechi jenjang agiogo aji onoki pelashishia agiztiker, saka tatembangbuba aser tongtibangba onük mataloktsüba ajanga onoki maneni masetshi-i nokdaktsüsa akümer," ta AYO tir Kesul Christopher Ltu-i ashi.

August 20 nü senden nung tenangzüktipbatem

* Angami contractor ka tasütsü

agi merenshitsü benokba agintüsüba

- * Kohima district adena or Angami nunger contractor tem alenba tetuyubatem agintüsüba
- * Anogo 15 tsüngda "Max Naga" merenshitsüba
- * Iba amala inyakyim tarutsü nung benoka minyaktsü tenangzükba aser inyakyim atema sasa bilemba officially lemsateptsüba.

Onük pezü rongnung asemba benoka inyakogo, saka onük tasembuba tang tashi benoka inyakyi lir aser iba dak ajemdaker maneni inyaksangshidar. AYO-i ashiba agi, parnoki ayongzükba Non-Cooperation Movement, kong Angami nunger lanurtem factional inyakyim nungi atsüngitsüba densema lir, iba ya NSCN-K (Khango) faction-i takhangba ajak mataloktsü tashi benoktsü ta shiogo.

AYO-isa, "One Government, One Tax" atema Angami Public Organisation-i nokdakba pusemba lemsatepbä den Angami nunger litsü nung senotsü rakzükrakdemba nungi pila alitsü tekümdangtsü metedaktsüogo.

Angami nunger ka danga iba telok nung densema mali aser tamendakdak nungi masetshi-i lir asünung ken o bentetsü atema NSCN-K (Khango) telok dak dang keta lir.

'Nagaland Job Reservation Policy' anema lungkak aitba sentong Mokokchung nunga takok ngua ayongogo



'Nagaland Job Reservation Policy' anema Mokokchung nung lungkak aitba noksa nung angur.

Mokokchung, 29th May (TYO): 5 Tribes Committee on Review of Reservation Policy (CoRRP)-i district Head Quarters 8 – Mokokchung, Zunheboto, Wokha, Kohima, Chumoukidema, Nuland, Tseminyu aser Dimapur yimitem nung 'public protest rally' sentong ka democratic yimya nung ayongzüka liogo. Iba lungkak aitba sentong ya "Nagaland job reservation policy" küm 48 tashi metitemi benshia aruba anema Nagaland nung aliba kin pungu – Angami, Ao, Sumi, Lotha aser Rengma kintemi pei pei district H.Q nung ayongzüka liasü.

Kasa lungkak aitba sentong Mokokchung nunga Ao Senden-

i ayongzüka town tiyongzü nung liogo. Tanü tsüngsang kanga majung tzünglu tulu aruaka iba sentong nung Ao Senden ketdangsürtemi anir Watsü Mungdang, Ao kaketsir Mungdang, Ao Lanur Telongjem, Tsükong 6 sanger, Mokokchung Town kubok ward-tem aser lenla tabensa nungi nüburtem longsoa arua aden.

Nüburtemi chitti tapak balala nung "Nagaland Job Reservation Policy" anema noktakba o balala züla bener iba rally nung shilem agia liasü. Police point nung sentong ka agir yang jagi Mokokchung DC office tashi lokti yimdong süa or yaküm 2024 nung kin 5-i sorkar nem takangba agütsüba chitti dak ajemdaker ano

tanaben nenshia züla ka AKM tir ajanga telok dang zünga shir Mokokchung SDO (Civil), Temsuhuba NCS nem amoktsü.

Sentong nung Ao Senden tir, Wb. Marsanen Imsong-i jembidang, kin 5 sanger asoshi telated tajung ka asen chirnurtem asoshi aser Naga nunger songjen lirumdemä sakku jenjang nung alitsü nükjidong nung iba lungkak aitba ya ayongba lir, ta metedaktsü. "Iba ya kin kar anema masü saka tim masüba 'job reservation policy' anema lir, aser Naga lokti nung ochi, lirumdemä sakku maongka aser temeten asoshi noktaker aser Tsüngremi iba sarasadem langzütsü amanger", ta ashi.

(Maneni tapak 2 nung...)

Naga nunger kin pongui job reservation policy anema rally ayongzük



May 29, 2025 nü rally ayongzükba Dimapur (noksa tekalen) aser Tseminyu district headquarter (noksa tsünglangba) noksa nung angur.

Dimapur, Monupii/May 29 (TYO): Tanü Nagaland nung aliba Naga nunger kin tulu pongu-i district balala nung state indang job reservation policy reprangshiang ta takhangba agüja rally ayongzüka liasü.

Iba sentong ya 5 Tribes Committee on Review of Reservation Policy (CoRRP) lenisüba kubok ayongzüka liasü, koba Angami, Ao, Lotha, Rengma aser Sumi kin indang tematiba lokti tentet temi mulunga 2023 küm tenteta liasü.

Tzüngsang mejungi liaka kin

pongu züngsemtep pei kin sübotsü sübur pei-pei Deputy Commissioner indang office bushia tetsüng agi jaja ao aser "ultimatum reminder" agütsü, kong September 20, 2024 nü memorandum agütsüba aser April 26, 2025 nü anogo 30 ultimatum agütsüba nung Nagaland sorkar melangzüba indang shia liasü.

"Sorkar nem temulung agütsüdaktsütsü aser onoki akhangba tali jangjatsütsü asoshi danga lenmag kecha malinung onoki democratic yimya nung

iba longkak aitba ya ayongzüker, ta memorandum nung shia liasü.

September 20, 2024 nü CoRRP memorandum agüja aliba metokmeperi ya mebentet tashi yimya balala nung tesashiba longkak aitba ya aser amokmerena liasü.

Backward tribes atema sorkar mapa nung menden wazüka yutsüba ya constitution nunga mela lir, saka mapang shia lepa mereprangshie tanen makai amshiba ajanga telesma adokdaktsü, temsü alirtem aser tajungtem shimba nung tetsüdaktsü agütsü, ta memorandum nung shia li.

1977 küm iba job reservation policy mezüng benokdang küm ter nung khen lepa reprangtsü shia lir, saka kodanga yamaji meinyak, ta ashi.

Parnoki sorkar dang iba ken o tekeraba nung jembitsü ayongzük aser tarutsü nung tensa tamajungba mekumdaiksütsü mechii sorkari par takhangba süoki ia agitsü iimlar ta lemsatepa liasü.

Nagaland nung küm 48 tashi sorkar mapa nung menden wazüka yutsüba anema Dimapur nung May 29, 2025 nü rally ayongzükba nung jashia aliba kin ponru nungi nisung meyirijang nung shilem 37 lir. Quota ya

aika shilem agia liasü.

Dimapur nung iba sentong ya Chakhro Angami Kuda Union, Ao Senso Telongjem Dimapur, Dimapur Lotha Hoho, Rengma Public Organisation Dimapur, Dimapur Sumi Council aser East Dimapur Sumi Council lungjemer DC Court Junction, Dimapur nung ayongzük aser rally nung shilem agirtemi placards balala amer Deputy Commissioner, Dimapur indang office bushia tetsüng agi jaja ao aser Nagaland Chief Secretary dangi züla memorandum ka Deputy Commissioner, Dimapur nem agüja liasü.

Iba sentong nung jembidang, "Census nung data peria maliba ajanga iba reservation policy lepa merepranger ta sorkari ashir asünungbo, iba policy agienang, aji mesüra mesüra kin ponru atema wazüka yujang," ta 5 Tribes Committee on Review of Reservation Policy (CoRRP), Secretary GK Zimomi-i ashi.

Sorkari iba policy lepa reprangshitsü süoki ia mebilema, onoki tim nung akhanger, ta ashi.

Tang sorkar mapa nung backward tribes asoshi menden wazüka yutsüba ya non-technical aser non-gazetted mapa nung shilem 37 lir. Quota ya

Nagaland anüdoklen aliba kin tenet asoshi shilem 25 aser tanüngba backward tribes pezü asoshi shilem 12 lir, ta CoRRP ajang ashi.

Iba reservation policy ya 1977 küm benok aser küm ter shia lepa reprangshitsü shia lir. Saka küm 48 kasa amshir. Iba mapang review committee tenet tentet saka committee yagi kodanga non-backward tribes dang kecha masüngdang. Parnoki backward tribes o kisüng angar sorkar mapa nung menden wazüka yutsüba shilem timba kumtsü, ta ashi.

Iba policy reprangshitsü mapang tongja-tongogo aser tanüngba kin pongui kanga akoksaogo aser advanced tribes aika alema parnok tajangzük ngua lir, ta pai ashi.

Nagaland nung three-tire reservation lir - lisopur atema shilem 80, shilem 41 wazüka yuja lir aser ano baclog reservation lir. Yangji reserved post atema 'minimum cut off marks, age relaxation, lower educational qualification' mali. Iba sülen ano backlog vacancies lir, koba küm trok mesüra tenet tashi amshir aser ibaji ajanga temsü aliba candidate tem akoksar, ta GK Zimomi-i ashi.

(Maneni tapak 2 nung...)

Mokokchung yimtak Viksit Krishi Sankalp Abhiyan sentong aka



Mokokchung yimtak Viksit Krishi Sankalp Abhiyan sentong nung Additional Deputy Commissioner Wb.Chumlamo Humtsoe-i aluyimertem den jembidang tangokba noksa

Mokokchung, Monupii/May 25(TYO): Mokokchung yimtak tanü Additional Deputy Commissioner Wb.Chumlamo Humtsoe-i aluyimertem sentong "VIKSIT KRISHI SANKALP ABHIYAN" May 29 nungi June 12 tashi India ajunga den külemi amongtsü asoshi tenzüküsüogo.

Sentong nung ADC Mokokchung Wb.Chumlamo Humtsoe-i jembidang India lima ajunga den külemi Mokokchung district nunga Viksit Krishi Sankalp Abhiyan sentong akaba ajanga nürburtem talisa aluyimertem ajangzüktsü, anungji aluyimertem India sorkari iba sentong atongba nung tajangzük ngutettsü inyaktsü merangtsülata adenshia aliba aluyimertem ajungshia jembi.

Naga nunger kanga dang tia aka Tsüngremi alima tzü mupong tajung aser ali temo keta aliba moatsü, anungji Naga nungeri shisa kaa ali tajungji amshia aluyimba ajungketa tsünüsempongtsü peria

tsünüteta chia ajemtsü aser yoktettüsü inyaktsü merangangta ADC Mokokchung-isa ayongzüka jembi.

Tsünüsempongtsü koma anepalua tsünütsü ta asuba onük nung ICAR-Nagaland Centre, Senior Scientist Dr.Ruth Assumi-i jembidang alima nung chiyungtsü aser aonsotsü tsünütetba nung China mezüngbuba aser India tanabuba jenjang nung lir, iba jenjang ka nung alidang asenok Naga nungera nentaka inyaktsüla ta ashi.

Naga lima nung süngjanglijang kanga junga tsünüteter, Naga nungeri tsünütetba süngjanglijangtemji junga anepalutsü nungtaker aser iba den külemi junga yoktettüsü asoshi aser talirtem puatsü asoshi packaging design tajung asütsüla, Iba den külemi Mokokchung nung coffee kanga junga adoker saka ya junga meyokteter, anungji coffee-ji junga yoktettüsü asoshi packaging design ajungsüla ta

Dr.Ruth-isa ashi.

Sentong nungsa KVKK Mokokchung Asst.Chief Technical Officer Wt.Imtilemla-ia jembidang Naga lima nung tsünüsempongtsü asoshi ali peria dang lir, ali peria liaka ali amshia meshira tsünüsempongtsüji junga memiteitstsüa ashi. Laisa tesem kar nungbo ali temo mali, anungji item alit emo maliba nungji an scü, napong scü, ak scü aser nashi scü nunger amshia tsünüsempongtsü asoshi meteta alitsü kanga dang nungtakerta aluyimertem den lemsatep.

Kasa sentong nung Mokokchung nung aliba Agri & Allied Department-tem ajak nungi Government Schemes aser Policies-tem rasaa ashi, Mokokchung Village Council Chairman ajanga tepela o jembi aser KVKK Mokokchung Sr.Scientist Dr.Keviletsu Khati ketdangsüba nung sentong agiba den paisa anogomong sentong teratet lemsatepa liasü.

'Nagaland Job Reservation Policy' anema... (TAPAK 1 NUNGI...)



Paisa "Nagaland job reservation policy" indang otsüren kar lemsatepdang, Nagaland state ngur 1967 nung reservation policy ya yanglu aser ibaji 100% nungi 80% ji Nagaland nung aliba lipuyimpur (indigenous) atema wazüka yutsü, aser 20% ji general category atema liasü. Liyonga arudang 1977 nung 80% nung toagi mezüngbuba kin 7 nem 25% wazüka agütsü, iba ya tongtibangsa nürburtem rongsenketzung aser tashitemet nung tangar memenepi atsüngzüka aliba pur nem wazüka agütsüba lir, ta paisa jangjashitsü.

Item kin 7 kübokja kin tila (sub-tribe) liasü, yamaji liaka kin tulu (major) aser tila (sub-tribe) ta kecha mebendangi 25% nung lagi dang agia aru, saka kodang sub-tribe-temji meilongi Govt-i kin ka asütsü tetemsü ta züngokdang, 25% nungi 12% sükloka 37% kümtsü, aser ano matamabensar-tem atema 4% wazüka yutsü, joko 40% dak tema tuguatokogo, ta paisa ashi.

"Naga nunger ajak ka dang, asenok tsüngta jenjang telemza mali, anungji, reservation

maongka agirtema joko küm 48 tashi tim tagitsü agia aruogo", ta paisa ashi.

Iba rally alitsü osang sangdonger külen, government-i Nagaland Job Reservation Policy dak sentakba nung committe ka shima mapa tenzükogo aser 3rd June, 2025 nü kin 5 sangertem iba onük jembitsü jaoka lir. Paisa iba oten dak sentakba ka jangjashitsüdang, tanü kechiba rally ya akar ta süra, "government-i taoba mapang iba reservation policy reprangshitsü asoshi committee 6-7 ben tashi shimogo saka mapa makümer, joko government dak tamang maker, anungji, tanü ya tetenzüker sur yimya balala nung lungkak aittsu kin 5 sanger telemtetba lir", ta paisa metedaktsü.

"Tanü asen chirnur kaket shisashiba aser tashi temetet nung akoteta zünger mapa mangur, saka tip külen kin karbo kasa mapa atema marks/percentage tekubokba ngur mapa angudang chirnurtem tezütangteper. Anungji, Nagaland nung maongka saku aser temetsüyim (meritocracy)

benshitsü asoshi tang aliba reservation policy ya tekaraba nung reprangshitsüla, aji mesüra anenatoksüla ta kin 5 sangeri noktaker", ta paisa metedaktsü.

Government-i iba dak sentakba nung telangzüba tajung magütsüra, kin 5-i kechi telemtetba agidir, aser mera balala agiyonga aodang sensosanger ajaki ola ka nung noktaktsü paisa ayongzük. Kin 5-i iba onük dak sentakba nung aiben ajurutepa tatsü talang ajak asadanger 20th Sept, 2024 nü government nem tezüluba ka agütsü saka telangzüba kecha magütsü nung,

26th April, 2025 nü telangzüba meshia anogo 30 züngzüksü, saka 26th May, 2025 tashi nung telangzüba kecha mangu. Anungji, tanü kin 5 sangeri pei pei district H.Q nung iba sentong ayonga government dangi

Deputy Commissioner ajanga takangba nenshia agütsür, ta Ao Senden tirisa metedaktsü.

Tanü iba sentong nung Watsü Mungdang tir, Wt. Tianaro Jamir, AKM tir, Sb. Lanutoshi Aier aser Ao Lanur Telongjem tayonger, Wb. Imnaonen Pongan par asema tayongzükba o tulu bener arua jembi.

Angh-i Goa Statehood Day salem lemsatep

Dimapur, Monupii/May 29 (TYO): Nagaland nung aliba nürburtem tenüng nung Angh La Ganesan-i Goa Statehood Day amungba anogo Goa nungertem den tepela salem lemsatepba den parnok nem tenüngsang agütsüogo.

Iba anogo ya telongjem tanüla, timtem tekangshi kokteta aoba aser sobaliba takar benjungba anogo ka lir, shisem.

MP Supongmeren-i "Viksit Krishi Sankalp Abhiyan" amenokba sentong nung shilemagi

Dimapur, Monupii/May 29 (TYO): MP (Lok Sabha) S Supongmeren Jamir-i tanü "Viksit Krishi Sankalp Abhiyan" amenokba sentong nung tongti tejaoker ama shilem agiogo.

Linük ajunga nung anogo 15 agitsü aliba iba pre-kharif campaign, state nung tenzükba sentong ya Krishi Vigyan Kendra Dimapur, ICAR Nagaland Centre aser ICAR-NRC on Mithun na longjemer ICAR-NRC on Mithun Centre, Medziphema nung ayongzüka liasü.

Sentong nung Dr. Girish Patil S, Director, ICAR-NRC on Mithun, Dr. H Kalita, Head of ICAR Nagaland Centre, Prof. L Daiho, Dean, School of Agricultural Sciences, Medziphema, James Swu, ADC Medziphema, Dr. Phool Kumari, Senior Scientist aser Head, KVKK Dimapur, Central Institute of Horticulture aser Nagaland sorkar kübok agri o allied department nungi lenirtem aser Dimapur, Chumukedima and Nuiland district nungi pogressive aluyimer noklang aikati shilem agia liasü.

Sentong nung o jembiba mapang MP-i, Naga nunger atema aluyimba sector ajungkestsü atema paia takokba tashi teyari agütsü tenangzükba agüja liasü.

Naga nunger kin pongui job... (Tapak 1 nungi...)

Iba rally nung kin pongu nungi lenirtemi Committee bhukuma nokdakba nenshia ashi. Onok kin ka mesüra political party ka mesüra lenir kar anema masü, saka onok ajak atema ochi obendang aser sako amshitsü khanga yangi adenshia lir, ta kin pongu nungi lenirtemi ashi.

Kohima, Chümuokedima, Mokokchung, Niuland, Tseminyu, Wokha aser Zunheboto district headquarters tem nunga iba rally ya kin pongu lungjemer ayongzükka agiogo.

Külen sorkari mapa nung menden wazüka yutsüba policy asadanga tebushiteta tem ita asem tsüngta agütsütsü asoshi Nagaland sorkari May 7 nü committee ka tenteta lir.



Godown tem nung süngjang artificially mendaktsütsü atema mozü amshiba asadangtsü atema Food Safety Team Mokokchung Zone-i May 29 nü Mokokchung nung meita aoba sentong ka ayongzükka agiogo.



India-i kiralongrartem aser parnok pusemertem kasa züngshitsü: Sanjay Jha

New Delhi, Monupii/May 29 metedaktsü.

(Agencies): Operation Sindoor outreach mission atema shimeteba telok ka nung lenir, JD(U) MP Sanjay Kumar Jha-i, tang nungibo India-i kiralongrartem aser parnok pusemba linüktem kasa dang züngshitsü, ta metedaktsü.

Jha-i aniba teloki Indonesia nung shisashirtem aser researchers ajurua senden menogo.

Sanjay Jha-i aniba telokisa Indonesia nung lenirtem dang kiralongra tebilemtsü anema raratsü asoshi India nungittü aser longjemer region nung yimjung atema inyaktsü ajungshi.

Iba sentong nungjisa Jha-i Indonesia sorkar aser Tir, Prabowo Subianto-i April 22 nü kiralongrartem Pahalgam amakba aitsüba atema pelaba lemsatep.

"Tanü onoki think tank aser academia member den senden amener. Kiralongra anema parnoki asalentongtem yanglur. Shisa lemsatepba sentong ayongzükba ya Pakistan nungi kiralongra anema India tangatetba aser asalentong lemsateptsü atema lir. Kiralongrartem Jammu & Kashmir amakba ya tesünep raksatsütsü aser India nung yimsü nung ajemdaker nübertem tsüngda tesünep raksatsütsü nükjidong nung inyakba liasü," ta Jha-i

Jha-i aniba telokisa Inter-Parliamentary Cooperation Vice Chairman, India-Indonesia Parliamentary Friendship group Chairperson, ASEAN secretary general aser Vice Minister of Foreign Affairs nunger den-a senden menogo.

Ajioda Indonesia nung ketdangsertemia kiralongra

sashia aitsüba den külemi India-

Jha-i aniba telok nung i kiralongra khenyongi züngsemtemji BJP MPs- Aparajita Sarangi, Brij Lal, Hemang Joshi aser Pradan Baruah nunger den Trinamool Congress MP Abhishek Banerjee, CPI(M) Rajya Sabha züngsem John Barittas, Congress lenir Salman Khurshid aser taoba mapang Indian Ambassador to France Mohan Kumar nunger lir.

Jha-i, "Nuclear amshitsü amokmerenbaji India-i magizütettsü. Kiralongra jenokdaktsürtem aser ajungkettsürtemi nuclear amshitsü, ta amokmerena atsüktü makok. Tarutsü nunga linük nung maneni kiralongra atalokra ozü sepaitemi sashia meyiptsütsü," ta ashi.

"India den Indonesia ama linüktemi kiralongra khenyongi magizüteter, aser ibaji mapa küma benoktsü atema tang nungibo India-i kiralongrartem aser parnok ajungkettsüba linüktem tsüngda kecha tebendang malitsü," ta paisa ashi.

Paisa, "Alima nung rongsenkettsüng tulutiba linüktem rongnung onok jenjang pezüuba nung lir aser 2047 küm tashi nungbo Terenlok India akümtü nükjidong yur inyaker. Ajisüaka ozü kidanger (Pakistan) melungsentsü shidak masü. Mapang shia parnoki kiralongra nung shilem agir aser terenlok mapa nung tetsükdaktsü agütsür. Ato kilonser Narendra Modi-i, tarutsü nung maneni India nung kiralongra ibajibö India anema

rara ayongba ama züngshitsü ta shiogo," ta metedaktsü.



May 29, 2025 nü Jammu & Kashmir kübok Anantnag district nung CRPF sepaitem den lanurtem aser sorkar ketdangsertemi yoga sentong ka nung shilem agiba noksa nung angur.

Taoba Union Minister Ghulam Nabi Azad Hospital nung mongdar

New Delhi, May 29

(Agencies): Taoba mapang Union minister, Ghulam Nabi Azad Kuwait nung aliba hospital ka nung mongdar, ta BJP MP Baijayant Jay Panda-i metedaktsü.


Operation Sindoor outreach mission atema shimeteba MP tem rongnung Azad densema lir. Pa densema aliba teloki Bahrain aser Kuwait na nung tongti ketedangsertem den senden aika menogo. Pa ainlen lia temang mejungi hospital-i anir ao.

Parliamentary telok nungjি lenir Panda-i X ajanga, "Linük balala semdangba tour tesadang nung lia Shri @ghulamnazar hospital nung admit süogo. Pa temang tajungba lir aser medical tetendangba kar agitsü," ta metedaktsü.

"Saudi Arabia aser Algeria na nungbo pa malitsü, iba atemaji onok sasar," ta pai ashi.

Panda-i aniba telok nung züngsemtemji Azad den All India Majlis-e-Ittehadul Muslimeen tongti lenir Asaduddin Owaisi, National Commission for Women nung taoba mapang chairperson aser Rajya Sabha MP Rekha Sharma, taoba mapang foreign secretary Harsh Vardhan Shringla aser tongti ketedangser kar lir.

Kuwait nung parnoki hospital jagi oa Azad semdanga liasü.



Bodhbarnü Ato kilonser Narendra Modi-i phone ajanga Ghulam Nabi Azad den jembia oang metetpelaa liasü.

Mongolbarnü Panda-i aniba telokji Saudi Arabia yimtiba, Riyadh tonga oa liasü.

Parnoki Kuwait Deputy Prime Minister & Minister of State for Cabinet Affairs, Sherida A S Al-Maousharji ajurua tawa India-i kiralongra anema raraba osang lemsatepa liasü.

Iba jakdang parnoki Bahrain semdanga Bahrain Deputy Prime Minister Shaikh Khalid bin Abdulla Al Khalifa ajurua pa dang arrtsü adena arur India nung kiralongra aser India nungertemi kiralongra anema raratsü melungtetba metedaktsü.

Parnokisa Shura Bahrain chairman, Ali bin Saleh Al Saleh-a ajurua kiralongra tebilemtsü lemsatepba den külemi linük ana tsüngda tesendaktep tashi itshitsü atema jembi.

Maharashtra nung tzünglu dak sendakba lendong nung nisung 16 süogo

Mumbai, Monupii/May 29

(Agencies): Tesüiba anogo pongu tsüngda Maharashtra nung tzünglu dak sendakba lendong balala nung nisung 16 süogo, ta ketedangsertemi metedaktsü.

Anentsüh lendong, tsüngi yaloktsüba, süngdong laoba aser kiojen chirepba lendong balala nung nisung 16 asü, ta state sorkari metedaktsü.

May 24 nungi tenzüka Maharashtra nung tzünglu

Pune district nung nisung asem asü, Thane nung nisung ana, Latur nunga ana aser Bhandara nunga nisung ana asü. Raigad, Ahilyanagar, Nagpur, Wardha, Chandrapur, Mumbai suburban aser Gondia districts tem nunga nisung kaka asü.

Iba dak alia May 24 nungi tanü tashi nung tzünglu dak sendakba lendong balala nung nisung 18 yiru aser kiset shiruru-a 41 süogo.

Jammu & Kashmir kübok Shopian nung kiralongrana apu

Srinagar, May 29

(Agencies): South Kashmir kübok Shopian nung kiralongrartem mita aoba mapang nung security sepaitemi Lashkar-e-Taiba (LeT) den tesendaktep aliba kiralongrana apu, ta sepaitemi metedaktsü.

Jammu & Kashmir Police Special Operations Group (SOG)-i 44 Rashtriya Rifles (RR) aser Central Reserve Police Force (CRPF) sepaitem den senteper kiralongrartem mita aoba mapang nung kiralongrana apu.

Intelligence osang nung ajemdaker sepaitemi kiralongrartem mita aodang

süngjang lu ka nung melung malemtsüsa nisung kar angu; iba sülen sepaitemi Irfan Bashir aser Uzair Salam na apu. Tenapronglaji tesüiba ita ka tejaklen Zainpora, Shopian nung kidang nungi apusoa liasü. Tenaji kiralongrana telok kar nung aden südi ta bilema liasü.

Iba dak sendakba nung FIR ka benokogo aser tena anema bushisüngdang tenzükogo.

Sepaitemisa tena ket nungi AK-56 prangpong ana, magazine pezü, injang 102, hand grenade ana, sen 5400, mobile phone ka, smartwatch ka, amtsük packet ana aser Aadhaar card ka puogo.



TIR YIMYIM

YIMOBILEM (EDITORIAL)

DIMAPUR FRIDAY, MAY (MONUPII) 30, 2025

Government mapa Iemsabayim

Nagaland nung alir Naga nunger tem asoshi tang tashi tachi-tajemtsü angudakji government mapa ya dang lir. Anungji, Nagaland nung state government yabo nübor tem asoshi ozüng latettsür aser terenlok sentongtem yanglutsüba yimten masü saka teyanglutetbabo kecha mali ser mapa agütsüba 'industry'-ang ka mesük. Ibayongji, tanga limatem memesük, Nagaland nung sen amshibaji government-i agütsüba ita sen dang aser Nagaland nung tangar memenepaka, asena asen yari takar-a ta shitettsüsa akaba takartemji government mapa nung alir tem dang lir. Atangji, government mapa nung ita sen kija chia aliba agibo takarbo mekümtettsüa akok saka Nagaland nungbo government mapa inyakertemming ano tanga business mapatema tajungba inyakteter, kechiyong government mapa nung alir tem dakji yimten tashi lir aser kati ka yariteptsüsa nüngdak nisungtem dena tesendaktep yuteter. Atangji, tanga state nungbo government mapa nung alir tem pei ita sen dak malang ki kang yanglura mesüra alu ka yimra, iba senji kong nungi anguba sen agi inyaker ta yimten nungi Vigilance telok balalai asüngdangtsü aser kuli shitak magütsütetra tepuokdaki aotsü. Ajisüaka, Nagaland nungbo office peon kati multi storey ki yangluyonga, shingaia kecha mebushitsü aser masüngdangtsü, aji Tsüngremi moatsüba temoatsü aser taichi ki asütsü. Ibayongji, Nagaland nung alir Naga nunger temangi government mapa inyakner südi. Aji oda, Nagaland nung alir Naga nunger ajaki government mapa inyakner saka government office nung mapa inyakertem marur ta asüba Naga lima ya angatetsüba ya temelabo masü. Iba ama tensa tia ka nung, Nagaland nung 'advanced' ta ajaba kin pungo, Ao, Sumi, Lotha, Angami aser Rengma kintem longjemer Nagaland nung küm 48 jakdang latetba 'Nagaland Govt. Job Reservation Policy' ya reprangshitsüla ta akangba ya, atangji, takangla akanger, kechiyong Nagaland nung alir Naga kin shia taoba küm 48 tsüngda tazüng temetetba aser tangatetba nung kanga renloker asütsü. Ashiko, taoba küm 48 tsüngda nungji tazüng temetetba nunga, akaba nunga aser government nung lenisüba mapatem nunga tesüpur tama aser tamapur tesü ta kümer alitsüba akok. Itemji mapang mapang shia reprangshia mapang aser nübor tem dak apet government-i telemetetba agia anitsü nüngdaker. Atangji, 1977 küm Nagaland government-i Nagaland nung aliba Naga kintem rongnung kaketshisatsü agi menur atongertem kin 7 shiteta parnok asoshi government mapa 'non-technical' aser 'non-gazetted' mapa adok shia küm ter atema shilem 25% lemzüksü. Aji oda, yimya agi küm ter sülen parnok nem lemzüksüba shilemji ajak magienyonga ajemtsütsü melen ano mapang kecha tatazük ka mali ser technical aser gazetted mapatem dena shilemang talila lemzüksüba lagi kar talila ajangzük dang kar talila akoksaogo. Aji oda, tangbo 'backward' ta ajaba kin 11 kümogo aser parnok nem government mapa adok shia shilem 37% agütsür. Ibaji kodang sükdangdir, Nagaland nung government mapa adok shia 'advanced' ta ajaba kintem asoshibo 63% dang anünger aser iba 63% nungjia 'backward' ta asüba kintemji dena lir, anungji backward telok nungjiang tennütsüka, kechiyong parnokbo 37% shilem nungjia adentsü aser tajungerbo 63% nungjia lemzüksü. Iba lagi aiben tenüng agibo advanced saka mapa agi backward pur memeneper ta tanü Nagaland Reservation Policy reprangshitsüla ta akanger kintemji akoksar. Ibaji marem ola adoker asütsü. Aji oda, joko mapang agia atonger aser putu tensa agia akanger, anungji Nagaland nung pi memeneper tem asoshi government mapa shiteta yutsüba ya kin apia masü saka kibong ka indang rongsen aser tazüng-temetetba jenjang asadanga lemzüksütsüla. Iba lagi dang shitakba teyari angutsü langa alir tem ajangzüksü.

OLEMSABANG

Rev. Kijunoluba
Lifetime Ministerial Award 2025
Recipient



Rev. Dr. L. Kari Longchar

Taküm Aser Tenzükba


Wadang

(Yashi adok nungi...)

6. NBCC Peace Committee 17-i NSCN (IM) tewangwang dang Muivah aser Steering Committee Hebron Camp nung ajurutepa temeim aser ochi agi parnok mapa tamajung ajak rakteta zünga ashi, IM dangi nübur sendenbaji nenok meimba agi masü saka IM-i tepsettsü tsübuba agi nenok dangi atenshia sayurba dang. Naga public-i IM sempar. Nenok melenshian. Memelenshira nenok majungsü ta ashidang parnok mepelai liasü.
7. NSCN K-i Mokokchung Public kanga kangshiba agi nuburi ola adok. Idangji parnoki Imtiba Luroi (Aug) 24, 2003 khaset aser public kanga ain adok nung K Mokokchung nung monga melitetsüsa aküm. Idangji Public O K na tangatettetpi arutsü asoshi NBCC Team Kitovi ajurutsü aru saka parnoki par Campi onok maitdaktsü amokmerena nungteta yok. Onoki tanabena merang saka magizuk.
8. NNC Federal telok aiben ajuru saka parnoki Shillong Accord atema clarification magütsütet.
9. "The Naga Struggle and Crisis: NBCC's Understanding", 2003 nung published asu.
10. NBCC 'Healing and Reconciliation' Rongui (Sept) 29, 2006, Chistian Higher Secondary School, Dimapur nung officially launched asü. NBCC Booklet, "NBCC's Proposal for Healing and Reconciliation of the Naga People" iba sendong nung release asu.
11. 'Naga National Reconciliation' Luchii (Dec) 20, 2001 Kohima Local Ground nung Nagaland Christian Forum (NCF) aser Naga Hoho launch asü. NCF aser Naga Hoho-i Naga Reconciliation Commission May 2003 nung commission asu. Commission Chairman Niketu Iralu aser Vice Chairma Rev. L. Kari Longchar shim-a liasü.
12. NBCC seed money for 'Sangmai Reconciliation Fund' 2004 kum tenzük. Chang oshi nung 'Sangmai' tetezü 'Ozü lima nung yimjung'.
13. Dimasa-Karbi militant group 2005 Karbi Anglong nung lendong adokdang NBCC Peace Minsitry-i yimjung shilem agi.
14. Manipur nung asenok yimtem yimli ken-o nung timtem adokdang Imphal, Senapati, Ukhrul, Tamenlong tesentakdep aser yimjung atema aiben sema senzü.
15. 'Peace Caravan Tour' November 2008 arogo tanishir 80 tema D.C, Tribal Hoho, Civil Society aser arogo lenir yimjung osang proka Nagaland lima region aser district ajonga sema senzü.
16. "Evaluation of the NBCC Peace Ministry," NBCC kum 60 tema inyaka aruba 2008 nung renem.
17. Yimjung inyakba mapa nung Naga civil society item den inyak: Nagaland Christian Forum, CNBC (now FNBC), Naga Hoho, Eastern Naga Public Organization, United Naga Council, Naga Mothers' Association, Naga Students' Federation, NPMHR, Tribal Hohos and G.B. Federation.
18. Beyond Nagaland NBCC Yimjung mapa nung Church Bodies item den tesendaktep akangshi-a inyak: CBCNEI, EFI, NCCI, Australian Baptist Union, North America Baptist Peace Fellowship, The Carter's Centre (Jimmy Carter's), Baptist World Alliance.
19. Quakers for Peace and Social Witness, Henry Martyn Institute aser tanga Peace Trust-i Naga yimjung mapa nung nungit.
20. RSS-i Naga Khristar Arogo anema allegations aser mapa inyakdang Tsüngremer ochi Nissan asoshi NBCC Peace Ministry-i aser Naga Christian Forum-i noktak. Rev. Dr. L. Kari Longchar ya Tsüngremi alaka Yimjung mapa inyaktsü atema jatetba tenzüker ka lir. Pa dang Tsüngrem Nisung Tasü Tait Yimjung Yanglur ta ajatsü tetemsü. Pai Tsüngremer mapa aika inyaka aruogo. Tanü pa tain kümaka, ano maneni Tsüngrem asoshi inyaktsü tarungba aser tejangraba pa dak lir. Pa ama asen Ao kin nungi sotetba asoshi Tsüngrem tenüng asanger. Pa ama Aor Laishir rongnungi maneni jenti adokdakjang ta sarasademi. Tsüngremi pa nem arishi maneni moaja asenok asoshi akhümdong sua lidakjangma.

Iba Olemsabang nung Iemsaba ken-o aser shisatsü ya iba ocet züluri
bilemba ken-o ama tazüngeri angateta agitsü mepishir

Khrista osangtajung proksü atema maaktsüla: Franklin Graham



May 27, 2025 nü Germany yimtiba, Berlin nung European Congress sentong nung sayutsüngir Franklin Graham-i jembidang tangokba noksa nung angur.

May 29, 2025: May 27, 2025 nü sayutsüngir, Franklin Graham-i Germany yimtiba, Berlin nung European Congress on Evangelism tenzüktüo.

Graham-i Khristantem dang atsü-anem kecha makai Khrista osangtajung sangdongtsü ayongzük.

Liniuk 56 nungi Evangelical lenir 1,000 den jembidang Franklin Graham-i, "Secular lima ka aser terata jenti aliba lima ka nung Khrista osangtajungji pungpa-pungpa mesangdongtsüla. Asenoki tashi amshia sayutsüngitsüla," ta ashi.

Anogo pezünü sentong tenzüka Germany tsür kentener Sarah Kaiser, musical artist Charity Gayle aser pianist Huntley Brown nunger leniba nung tekülem aser tetushi ken aten. Tetenzük sentong nung tetushi tejaokerji Ethiopia Ato kilonser, Abiy Ahmed Ali liasü.

Evangelische Allianz Deutschland (German Evangelical Alliance, EAD) nung Board züngsem, Reinhardt Schink-i tejaokertem pelaa agizükba den külemi Europe nung Khrista osangtajung prokba puti otsü lemsatepa liasü.

Paisa 1935 küm Nazi party tentetba ajanga Berlin nungi tesempa prokba metedaktsü.

"Germany nunger ka ama onoki tangartem aser taküm aliba Tsüngrem madak onok tuluba ama mezümeküma liasü," ta pai ashi.

Paisa, "Ajisüaka iba Congress ajanga tangbo Europe nung taküm aser yimjung osangji Berlin nungi sangdongtsü. Iba osang ya angashidaktsüla, kechiyong iba osang ya taküm melenshidaktsüba Tsüngrem O lir. Iba osang ya meimchir ajak atema osangtajung lir. Iba ya Yisu indang lir," ta ashi.

Tetenzük sentong nung sayutsüngir Franklin Graham-i Second World War mapang Japan nunger sepai, Hiroo Onoda indang otsü lemsatep.

Onoda ya Second World War mapang nung Philippines nung aliba arem nung lemzükja liasü. Rara tembangba sülen-a pai tanishirtem tashi angaa yangji küm 30 ali.

Onoda otsü nung ajemdaker Graham-i sepai kati tanishirtem lenirtemi Yisu Khristai tenyaba wadang tulutibaji tashi angaa inyaktsüla, ta ayongzük.

"Ibaji asenok dang tuyuba wadang lir. Iba ya tamangertem ajak atema tetuyuba lir, aser iba tetuyuba ya kodanga memelenshir," ta Graham-i ashi.

"Kanga secular akümba lima ka aser Khrista anemba lima ka nung 2025 küm asenoki koma alima nung osangtajungji proksü?" ta pai asüngdang.

Khrista osangtajungji atangji kanga tongmelang, ta shia Graham-i, "Asen menen atema Tsüngrem chir Yisu asü, tasemnübuba nung tanaben shia aru aser Pa nütsüngtem dang alima tesem ajakleni oa tekümet osangtajung proksü tetuyuba agütsü," ta ashi.

"Asenoki ibaji sayutsüngidi. Asenoki ochi agi ibaji sayutsüngidi. Tashi agi sayutsüngidi aser amanga sayutsüngidi," ta pai ayongzük.

"Pa tasü masü. Pa taküm lir. Ibaji atangji aser iba ya osangtajung lir. Tekümet atema Tsüngrem tashiji hadir lir. Asenoki osangtajung ajakji sayutsüngitsüla," ta pai ashi.

"Nai iba nungi kar agentsü makok, kechiyong asenoki temenen indang mejembira kechiba asenoki tekümzüker ka nüngdaktsü? Asenoki azü indang mejembira, azü metokshii kodaser asenoki tatok angutsü?" ta pai ashi.

"Medemertem, asenoki Khrista osangtajung sayutsüngitsüla. Osangtajung atema asenoki maaktsüla. Ibaji sangdongang, ayimdenang aser tsübu teli. Kodang asenoki Kangki indang aser azü indang sayutsüngidir iba nungi Tanel Temeshi tashi lir. Kodang asenoki tatok meshiba, tasüba, aremba aser shia aruba indang sayutsüngidir yangji Tanel Temeshi agi asüngba tashi lir," ta paisa metedaktsü.

"Pei tajaba nungi matsüngshitsüla. Secular loktiliba ka nung reshikangshi tali liaka aser osangtajung prokba atema jail nung yuaka chichia pei tajaba angateta

inyaktsüla," ta pai ashi.

Franklin Graham-i, "Ajak melenshir aser kanga kera melenshir, aser temelenshi denji liromedema mouteter, ajisüaka langka memelenshir aser ibaji meimchir temelungjang lir. Meimchir temelungjang memelenshir. Ainkar Yeremias-i, ajak dang nungi temelungsa tekelakba lir ta ashi. Meimchir melungjangji melenshidsütetsangji Tsüngrem dang lir," ta ashi.

Satan asalentong balala mita alitsüla aser Laishiba tesayuba nungi mepilatsüla, ta shia Graham-i, "Tsüngremi kiyimbaji tebur ka aser tetsür ka na tsüngda yanglu. Asenoki mangattep maginer, ajisüaka asenoki osangtajung sayutsüngira aser nüburtem dang temenen nungi pilaa alitsü aser tamang agi Kibuba Yisu Khrista dak temelung lemtettsü atemaa shira karbo jashitsü," ta ashi.

"Kangki tashi ajanga mapa inyakbjai ajakbo mangateter. Ni sayutsüngiba mapang nung nisung karbo tenük nung nüktüi atsünger temelung raksar saka karibo rangshia dang repranger. Tsüngremi iba nisungba melungjang nungi mapa inyaker saka tangar ka melungjang nungbo mapa meinyaker. Ni ibaji mangateter, saka Tsüngremi mapa inyakbjai asenoki meteter. Osangtajung nung tashi lir," ta pai ashi.

Franklin Graham-isa khen mapang ka nungbo tebu, Billy Graham ita trok tashi kidangi marui sayutsüngia jajaba lemsatepa pai evangelical lenirtem dang timtem balala liaka pei tajaba meteta Tsüngrem tenzüktü ayongzük.

"Asenoki osangtajung sangdongdi. Europe-i ibaji nüngdaker. Europe nung osangtajung nüngdaker. Nai ibaji meinyakra shibai inyaktsü? Putu ajak nung osangtajung sangdongtsüla. Kibubai tenyaba wadang ya küm 60 nung khen mesüra küm 20 nung khen inyaktsü wadang ka masü. Iba ya anogo shia, ita shia aser küm shia inyaktsüla," ta paisa metedaktsü.

ANOGO ABEN TSÜNGREM DEN

Mapa anenba

Nisungi pei züsen nung tepela ngua chia ajemba dak alema tajungba kecha maka.

Sayutsüngir 2:24.

Hopta nung deobarji anogo balaka shiteta amonger. Tenla kidangi arur tashi tait Tsüngrem o angashir aser Kibuba Benjong nung shilem agir, aser tasüngjibo Tsüngrem tsüngdang tongtibang anogo masu ama alima nung nemzur. Ochiji alema kecha talila aotsü makok!

Mapa inyakba anogoji Tsüngrem tenzuktsu aoshi mapang tajung. Tsüngremi mapaji shimiteta meshitet. Adam aser Eva Eden tsuki nung yutsü. Parnok azümasena alitsü atema masü saka Pai yangluba ajak anebalutsü asoshi yutsü.

Na mapa inyakdakji Tsüngrem chir ka ama Kibuba Yisu Khrista tenzükdak lir. Nai ne mapa pela meinyakra nai shiba atema inyaker amadoker aser Pauli ashiba bilemtettsü tenüngdaktsü. "Kechi mapasa nai inyaker, nisung atema masü, Kibuba atema inyaker ta bilema ne mulungjang ajak agi inyakang". (Kolosi 3: 23).

Mapaji koda temoatsü Tsüngrem chirtem arua Pa tenzuktsü aser Khrista asüba aser tasü nungi shia aruba ajanga pa dangi aotsüba asenok asoshi maongka lir.

Nigeria nung pastor ka gari lendong nung asü



Rev. David Ayuba Azzaman

May 29, 2025: May 24, 2025 nü Nigeria nung nüngtugu pastor ka evangelistic sentong ka nung sayutsüngiba sülen meyipa arudang gari lendong nung süogo.

saka nikongdang 2:56 ako nung pa süadok," ta metedaktsü.

Albert-isa social media ajanga, "Ozü adianu ka, külem tenzüker ka, tasütait sayutsüngir ka aser Kibubar lu nung meranga inyaker ka pilaogo.

Rev. David Ayuba Azzaman ya onok rongnung tajungtiba liasü. Pa dak tasütait tanelaa liasü aser samaba tanelatem kümzüktsü atema pai kanga nendaka inyak," ta metedaktsü.

Azzaman ya Islam yimsü toktsür Khristan yimsü agizükter ka liasü. Pai Nigeria tesem ajungalen, talisa northern Nigeria nung sayutsüngia jaja.

Nigeria National Assembly nung taoba mapang Kaduna state nungi MP, Jonathan Asake-i, "Azzaman ya sayutsüngir tajung ka liasü aser tamangba yimsü temeden atema inyaker ka liasü. Pa alima nungi pilaba atema ni mangyimer, ajisüaka pai pa akumli mapang nung Khrista aser meimchir temeden atema tasü itta nokdakba atema ni pelar," ta lemsatep.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tengutetba

(v) mengui aliba ngua meteta aruba, tebusitete (finding)
 * Lokti indang sen samaba indang tengutetba kuli kecha mali asü.

Tenguteter

(n) bushiteter, mangu aliba ngutetba (discoverer, founder)
 * Tenguteter aika rongnung US-i tama ita tonga orr angu.

OLONG PAITEP # 7166

1	2		3	4	5
			6		
7	8				
9			10		11 12
		13		14 15	
16			17		18
			19	20	
21	22				23
24					

TIPLÉN

1. Saku - (4)
 6. Songjen - (7)
 7. Mali/Tazüng - (4)
 9. Tasen apok - (6)
 11. Songtem - (3)
 13. Ata liasü - (5)
 16. Tzünglu den küleme tsüker - (3)
 17. Aso tila - (6)
 20. Tashi makum - (4)
 24. Tenüng kasa jatepba - (7)
 25. Ki yangluba oset - (4)

LANGTSÜNGLEN

1. Taksep - (3)
 2. Langtem - (5)
 3. O tamendaktak - (4)
 4. Nütü tebuba - (3)
 5. Anüngdang tesangwa - (3)
 6. Apitet - (5)
 7. Yagi jungdaktsür - (4)
 8. Anogo semer ka - (3)
 10. tatsü - (3)
 12. Tebur kidong aser züngä kasa tsüngda jatepba - (4)
 14. Pela agizükba tapu ka - (5)
 15. Tenüng atet - (3)
 18. Mejanga onü - (5)
 19. Talak techira - (4)
 21. Maneni - (3)
 22. Nübo teyi - (3)
 23. Meshi - (3)

OLONG PAITEP # 7165 TELANGZÜBA**TIPLÉN :**

2. Pongsen, 5. Lepko, 7. Omen,
 8. Maongka, 10. Yangkhu,
 12. Senpong, 14. Angu, 15. Raksa,
 16. Arameso,

LANGTSÜNGLEN :

1. Alimang, 2. Pongan, 3. Samaru,
 4. Nün, 6. Pio, 9. Nüngdak,
 10. Yongya, 11. Kongro, 13. Ora,
 14. Ata.

NAI-A YA METETTER MA**INDIA TEST CRICKET TEAM NUNG CAPTAIN SUA ARURTEM YAMAI :**

- | | | |
|------------------------|-------------------------|---------------------|
| 01: CK NAYUDU (1932) | 14: M. PATAUDI (1962) | 27: GANGULY (2000) |
| 02: VIZIANAGRAM (1936) | 15: BORDE (1967) | 28: DRAVID (2005) |
| 03: PATAUDI SR. (1946) | 16: WADEKAR (1971) | 29: SEHWAG (2005) |
| 04: AMARNATH (1947) | 17: VENKATARAMAN (1975) | 30: KUMBLE (2007) |
| 05: HAZARE (1951) | 18: GAVASKAR (1976) | 31: DHONI (2008) |
| 06: MANKAD (1955) | 19: BISHAN BEDI (1976) | 32: KOHLI (2014) |
| 07: GHULAM (1955) | 20: VISWANATH (1979) | 33: RAHANE (2017) |
| 08: UMRIGAR (1955) | 21: KAPIL DEV (1983) | 34: KL RAHUL (2022) |
| 09: ADHIKARI (1959) | 22: VENGSKAR (1987) | 35: ROHIT (2022) |
| 10: GAEKWAD (1959) | 23: SHASTRI (1988) | 36: BUMRAH (2022) |
| 11: PANKAJ ROY (1959) | 24: SRIKANTH (1989) | 37: SHUBMAN (2025) |
| 12: RAMCHAND (1959) | 25: AZHAR (1990) | |
| 13: CONTRACTOR (1960) | 26: SACHIN (1996) | |

Mizoram-Tripura arrtsü nung guest house ka bomb agi raksatsü

Aizawl, Monupii/May 20 (Agencies): Mejangjaba nisungtemi Mizoram aser Tripura na arrtsü nung mangatettep aliba tesem ka nung tang yangluba aliba guest house ka Bodhbarnü raksatsüogo, ta police officer tejen kati ashi.

Mizoram Inspector General of Police (Law and Order) H. Ramthlengiana-i ashiba agi, mejangjaba nisungtem yagi bomb amshia iba guset house ya raksatsü, koba Tripura Forest Department-i yangluya liasü.

Iba ki ya Mizoram nung Mamit district kübok Phuldungsei yimtsüng anasa mangatettep aliba tesem ka nung sua liasü. Iba tesem ya state anaprongli parnok meyong ta ashir, ta paisa shisem.

Ramthlengiana-i ashiba agi, Mizoram-i ashishiba sülen Tripura sorkari iba ki yangluba ya tawa sota ata liasü.

Bomb poklokjaka state ana yongtsü nung arrtsü nung tensa junga dang lir, ta paisa shisem. IGP-i ashiba agi, iba tatalokba indang parnoki

Tripura IGP aser district administration nem metedaktsüogo.

Paisa, iba ken o ya tang bushisüngdangdar, ajisüaka iba kidang bomb pokloktsüba dak sendakba nung tang tashi nung nisung ka danga pua mali.

Mizoram aser Tripura na arrtsü km 66 talang lir.

Mizoram nung lokti tentet balala aser kaketshir lokti tentettemi iba guest house yangluba ashishiba sülen state ana arrtsü nung tensa mejungi küma liasü.

Tzünglung medangi aruba ajanga Manipur nung tesem kar metsüngogo**Imphal, Monupii/May 29 (Agencis):**

Bodhbarnü nungi tenzüka tzünglu medangi aruba ajanga Manipur kübok tesem kar aser talisa state yimtiba Imphal kübok tesem kar tzü agi metsüngogo, aser iba ajanga gari senzüsenpong nung tetsüdkaktsü adokba den nüburtem anogo shia inyakyim nung tetsüdkaktsü adokogo, ta yimti nung alirtem aser ketedangsürtemi Brehostibarnü metedaktsü.

Imphal kübok kiyong balala tzü agi metsüngogo aser iba ajanga gari aser nüburtem senzüsenpong nung tetsüdkaktsü adokogo.

Sources ajanga ashiba agi, tzünglu aruba ajangsa Imphal

nungi kilometer 84 pilar aliba Ukhru district headquarters nung anentsüh aludaktsüogo.

India Meteorological Department (IMD)-i, state kübok district balala nung tzünglu kanga sashia arutsüba aser mopung tesashi aontsüba takzüktettsür lir.

State south len Chandel, Churachandpur, Pherzawl district tem aser Kakching aser Thoubal nung tesem kar nung taruba anogo ishika tsüngda maneni tzünglu arutsü imlar.

Southwest monsoon yagi Manipur May 25 nü nungi kongshiogo.

IMD indang Imphal Meteorological Centre-i ashiba agi, Brehostibarnü Myanmar

den arrtsü nung aliba Moreh jila nung tzünglu tesashitiba (102 mm) aru aser Kamjong (96 mm), Chandel (76 mm) aser Ukhru (60.8 mm) nunger nunga tzünglu sashia aruogo.

Tenem lima nung ayongtem nung tzü timba ayim tenzükogo ajisüaka osang agütsüba mapang tashi nung lendong atalokba indangbo ketedangsürtemi kecha osang magütsü.

Taoba küm Cyclone Remal sülen state aseben ren tzüng agi metsüngba ajangshiba sülen tang tzünglu kanga sashia aruba ajanga tesem kar metsüngogo.

Taoba küm tajangshiba majungba ajanga nüburtem kanga kümdangtepa atatedpar.

Mizoram CM-i Aizawl & Delhi na rail ajanga indang indanga sendakteptsütsü mepeshi**Aizawl, Monupii/May 29 (Agencies):**

Mizoram-i state yimtiba aser New Delhi na tsüngda rail tesendaktep tajungba kümädkaktsü atema Rajdhani Express indang service internet service amenoktsütsü aser railway reservation centre aser parcel management system dena amenoktsütsü mepeshia astingdangogo.

Union Railways Minister Ashwini Vaishnav den New Delhi nung senden amenba mapang CM Lalduhoma-i pa dang Bairabi-Sairang broad gauge railway line ya inyaksangshi tenzükba sülen Sairang aser linük yimtiba na tsüngda Rajdhani Express senzüdkaktsü mepeshia liasü, ta kasa sangdong ajanga metedaktsü.

Sairang ya Aizawl nungi km 21 shi pilar lir. Chief Minister-isa, Vaishnav dang Sairang aser Kolkata na tsüngda Howrah railway service agütsütsü aser Sairang nungi Tripura-i indang indanga train yoktsü mepeshia liasü.

Sairang railway station ya world-class railway station ka kümä yanglutsütsü mepeshia Lalduhoma-i, Union Minister

dang railway station nung internet service amenoktsütsü aser railway reservation centre aser parcel management system dena amenoktsütsü mepeshia astingdangogo.

Maneni chief minister-i, Hortoki, Kawnpui, Mualkhang, aser Sairang ta railway stations pezü atema staff tem shimbä mapang takok tashi local tem shimsü atema Vaishnav nem temepishiba ka agüja liasü.

Kasa mapang nung

Vaishnav-ia, Mizoram chief minister-i mepeshibatem ataloktsütsü atema takokba tashi jenjang agitsü ta tenangzükba agütsüogo, ta kasa sangdong ajanga metedaktsü.

Km 51.38 talang Bairabi-Sairang broad gauge railway line project ya July ita officially

lapoktsütsü imlar. Iba yagi Mizoram linük nung tanga tesemtem den sendaktepdaktsü.

Railway line lapokba sülen iba ajanga mezunguba Aizawl/Sairang ya Assam nung Silchar jila den sendakteptsütsü.

Northeast Frontier Railway-i railway line project ya inyakdar, koba centre-i 2008-2009 küm sanction süa liasü. Taoba mapang NF Railway Chief Public Relations Officer Kishore Sharma-i ashiba agi, parnoki project tembanga yangluogo aser July ita lapoktsü atadar.

Paisa, par team-i May ita km 51 talang railway line atema trial runs agiogo, ta ashiba den tang safety inspection agidar ta ashi.

Bairabi-Sairang railway line project ya 2015 küm nungi yanglu tenzük aser sen crore 8,200 intokogo.

**GOVERNMENT OF NAGALAND
DIRECTORATE OF HIGHER EDUCATION
NAGALAND: KOHIMA**

NO.HED/ADMN-DRB/48/2022

Dated Kohima, 29th May 2025

NOTIFICATION

In pursuance to the Government letter NO.HED/ADMN-DRB/48/2022/311 Dated 31.01.2025 for appearing in the interview to the post of Sweeper Group D under the Deptt. Of Higher Education, Govt. of Nagaland, it is hereby notified to all the applicants that the interview will be held on the 4th of June 2025 at 11:00 AM in the Conference Hall of the Directorate of Higher Education Nagaland, Kohima.


* No separate call letter will be issued in this regard.

* The applicants are informed to bring the following documents for verification:

(1) Original Copies of Educational Qualification and ST/Indigenous Certificate.

Sd/-
EX-OFFICIO DIRECTOR
HIGHER EDUCATION.

June 2026 tashinung Bangladesh elections agitsü: Yunus



Dhaka, Monupii/May 29 (Agencies): Bangladesh nung election tasen agitsü asoshi nübertem aser yimten yimsüsür temi tali akhangba mapang Nobel Prize angur Muhammad Yunus-i linük nung taruba election ya taküm December aser taruba küm June ita tsünta mashi mapang ka nung agitsü ta ashi.

Bangladesh interim government indang advisor Yunus ya tang Japan nung sorkar maparen asoshi oa lir, aser Tokyo nung nübertem adenshia alidak jembidang pai iba osang ya sangdong aser kasa mapang Dhaka nung opposition Bangladesh Nationalist Party (BNP) ajanga rally tuluka ayongzüka liasü, shirnoki lanurtem indang yimtenren temeden akhi ama amshidaktsütsü ayongzüka liasü.

Muhammad Yunus-i ashiba

agi taruba national polls ya tekeratiba agi December 2025 mesüra temonuba agi June 2026 tashinung agitsü. Par administration ajanga electoral aser governance temelensi maparen inyaka aliba nung ajemdaker mapang latettsü, ta pai ashi.

Political telok balalai matatetba angateta, "Electoral agidang elected government ajanga khuret ajak abentsü aser onoki parnok nem ibaji amoktsütsü. Nübertemi election kodang agitsüar parnok dang shiang ta nenshia ashir, kechiaser politicians temi yimsüsüba menden nung amentsü kangasa matateter. Anungji ni parnok dang nangzüka arur. Taküm December mesüra temonuba agi 2026 June ita, anungji ita trok tawa lir, onoki temelensi koda kerainyaker, yangji ajemdaka lir," ta Muhammad Yunus-i ashiba.

Pai maneni election agitsü asoshi mapang atsüshiba indang rasa ashi. "Temelensi meilongi aser teinyaktetba tera dang lira asenoki mapang talangba agitsü. Aser mapang talangbaji tatem makai motettsü. June 2026 tashinung renemtsüla. Anungji iba mapang tatakzük nung onoki inyaker," ta pai ashi.

National elections ya December tashinung agiang ta takhangba agütsüba ulushia BNP ajanga linük yimtiba Dhaka densema yimti balala nung rallies tulu ayongzüka liasü. BNP Acting Chairperson Tarique Rahman-i interim government dang tekumdagtsü ashi aser election agitsü mapang thinena maotsü ajungshia liasü.

Tezüluba nung melenshiba kisüng masü saka shidakba nung democratic yimya shidak amshia inyaktsü tongtipang lir ta Tarique Rahman-i social media X nung ashi.

"Texts melenshiba mesüra paper nung institution melenshiba dang nungi nisung ka tangatetba melenshitsü ya tongtipangtiba ta ni jembijen jembir. North Korea indang constitution nunga linük ya 'Democratic People's Republic of Korea' asütsü shia lir. Ojangbo alitsü akok, saka iba sülen anidakba ajanga democratic integrity jangjatsür," ta pai ashi.

Pakistan-i amaktsü aliba tasa India-i raksatsü: Shehzad Sharif

Lachin, Monupii/May 29

(Agencies): Islamabad-i May 9-10 tsünta amaktsü aliba tasa Indian sepaitemi raksaja Rawalpindi airport densema tongtipang military bases nung BrahMos missiles khaloktsü, ta Pakistan Ato Kilonser Shehzad Sharif-i yimjak nung nangzükogo.



Operation Sindoor nung shilem ka ama BrahMos supersonic cruise missile amshia Pakistani military bases amak. India indang Operation Sindoor sülen arütsü nung Pakistan-i tensa tamajungba kumdakja India nung yimitem amaktsü drones yok, ajisüaka itemji air defence system - S-400 aser Akash ajanga khazuka yok. Rara mesüba nung India-i telangzüba agütsü aser Pakistan nung aliba yimi balalai drones yoka liasü.

Mapang tatsüka lir May 10 nü New Delhi aser Islamabad ajanga ceasefire ka sangdong, koba Pakistan indang DGMO ajanga Delhi dang mitkar inyakyim anentsü ayongzükba sülen telemetebta agia liasü.

Pahalgam nung kiralongrar temi civilian 26 tepsitba sülen India-i Operation Sindoor kubok Pakistan aser PoK nung kiralongrar aliba tesem toku amak. Iba mapang Jaish-e-Mohammed (JeM) chief Masood Azhar'er kinunger züngsem ter den pa den yariteper pezü densema kiralongrar 100 dak tema tepseta liasü.

Russia-i yimjung asoshi Ukraine den jembishinü tasen kaner

Moscow, Monupii/May 29 (Agencies): Russia-i yimjung tangatetep atema par sentong lemsateptsü asoshi Istanbul nung taruba Hombarnü Ukraine den jembishinü tasen kaner ta Bodhbarnü ashi, saka Kyiv-i iba senden amenba tajangzük alitsü mechii proposal ya jelia angutsü nüngdakm ta ashir.

Ukraine-i par indang 'peace terms' ya Russia nung agütsüogo ta ashir aser Moscow-ia kasaji inyaktsü akhanger.

"Russia den ano senden amentsü onoki memulungi mali aser parnok indang memorandum atar," ta Ukraine defence minister Rustem Umerov-i social media X nung ashi, shibai tesusa Russia den jembishinüba mapang Kyiv tenüng nung shilem agia liasü.

"Par document reprangshia asadangtsü asoshi onok nem agütsür linük yutsür aotsüano anogo tajemba agi anogo pezü lir. Diplomacy nung tamendak dak tejangla aser takang alitsüla, aser taruba senden nung tajangzük alitsüla."

Moscow-i February 2022 nungi amak tenzükba ajanga nisung meyirijang aika süogo aser eastern aser southern Ukraine nung tesem jenti raksatsüogo.

Tang Russian mitkar kubok Ukraine litsü-lik shilem pongushi lir aser yangji 2014 küm rakzükba Crimean peninsula dena lir.

Russia-i peace terms indang "memorandum" ya taruba Hombarnü senden amendang agütsütsü ta ashir, aser Foreign Minister Sergei Lavrov-i iba proposal indang US Secretary of State Marco Rubio den lemsatepogo.

"Vladimir Medinsky-i anir ozü delegation-i Istanbul nung June 2, Hombarnü tanaben ajurutepa jembishinü akadang Ukraine delegation nem memorandum ka agüja nüngdakba rasaa ashitsü renema lir," ta Lavrov-i video sangdong ka nung ashi.

Medinsky ya political scientist aser taoba mapang culture minister inyaka liasü aser May 16 nü Istanbul nung mezüng senden amendang Russia nunger pai anir liasü.

Tawa linük ana tsünta anünglen nungi kanga sashia maktepa arur, kong Ukraine-i ammang tepiyong Russia dak drone timtiba amshia amak aser Moscow-ia hopta

tatemlen Ukraine nung yamaji maka liasü.

Trump-i Bodhbarnü osangbener den jembidang, yimjung ken o jembiba mapang Russia-i bomb poklokja amakba atema kanga mepelar ta ashir saka Moscow nem tenokdangba/temerenshi tali agütsütsü ayongzükba nungbo telangzüba magütsü.

"Ni tezungzüktep ka yanglutetsü amai bilemra, ni yamaji inyaka iba maparen meraksatsü," ta pai ashi.

Bodhbarnü Lavrov den phone ajanga jembidang, iba rara tembangtsü asoshi tajunglen nungi tangatetba tajung nung Ukraine den jembishinütsüba ya dang lenmangji lir ta Rubio-i ayongzük, ta State Department odongtar Tammy Bruce-i ashi.

Ukraine Tir Volodymyr Zelenskyy-i Trump aser Putin par asem senden amentsü ayongzükba Kremlin-i magizük.

Linük anaprong nungi yimjung ken o jembirtem tsünta "concrete agreement" ka yangluba sülen ang Putin

aser Zelenskyy densema senden mentetsü ta Moscow-i ashi.

Yimjung alitsü mechii Kremlin-i Ukraine dang NATO nung adentsü mangdang yutsütsü aser par litsü-lik Russia kubok aliba agütsütsü akhanger, saka Ukraine-i ibaj khenyongi tamakotsü ta ashir.

Ita tetenzüklen Istanbul nung linük ana tsünta jembishinü akaba mechii linük anatsü nungi tepuokdak alir 1,000 melentep aser pei-pei yimjung sentong atema inyaktsü mulungtepa liasü.

Ajisüaka Russia-i tanen makai Ukraine amaker aser kasa mapang ceasefire alitsü ayongzükba magizüker.

Russia-i yimjung maparen soita ayur aser parnoki tashiyim amshia amakba anentsü tejangraba mali, ta Zelenskyy-i Bodhbarnü aitsü.

"Parnoki rara metembangtsü asoshi maneni kuli tem bushitsü," ta pai Berlin nung German Chancellor Friedrich Merz den külemi osangbener senden ka nung jembidang shia liasü.

35+ MFL-i Grassroot Football Clinic ayonger

Dimapur, Monupii/May 29 angazüksü atema maongka tongteprateptsü metedaktsüogo.

(TYO): 35+ Mokokchung Football League-i tanur football asayatsü jangrartem atema Grassroot Football Clinic ka ayongzükba sangdongogo. Clinic ya June 23 nungi 27, 2025 tashi agitsü.

Barak FC Head Coach Brando Kamson tawabangba kubok tebur aser tetsür arishi küm 9 nungi 14 tsüngda alirtem nem training agütsütsü nükjidong nung iba clinic ayongzükogo.

Grassroot Football Clinic ya Mokokchung temeket nung aliba tanur football asayartem terenlok asoshi ayongzükogo, koba fundamental skills, teamwork, aser sportsmanship dak rangloker agitsü. Coach Brando Kamson tawabangba kubok clinic nung shilem agirtem parnok football sempet arangtetshitsü aser tasa tasen

Tongtibang temetettsü kar:

Category: Tebur aser tetsür Arishi küm: 9-14 years Mapanglem: June 23-27, 2025

Registration: Angati

Venue: Mojabi Futsal, Salangtem Ward

Iba clinic nung shilem agitsü jangrartemi registration form ya MKG Sports Store (opposite MMC Shopping Complex in Dilong Ward, Mokokchung) nungi agizüka idakji submit süttettsü. Menden tatakzük dang astünung mezüngpur nem tama maongka agütsütsü.

Iba dak sendakba nung osang tejangjaba agitsü atema item number; Imcharen (Secretary, MFL): +91 7005358226, Aongsen (Convenor, MFL): +91 7629017838 ajanga

Iba grassroot inyakyim ajanga local football community dak kongshia lanur asayartem nem training aser exposure agütsütsü. Iba setong nung shilem agitsü jangrar ajak dang pei sempet arangtetshitsü atema iba maongka tajung agia züngoksemtsü ajungshir, ta clinic ayongertemi metedaktsü.

Bayern-i Leverkusen nungi Tah anisemogo



Monupii/May 29, 2025 German Cup naprongla (Agencies): Bayer kokogo.

Leverkusen nungi defenter Jonathan Tah transfer taah makai parnok den adenba Bayern Munich-i sangdongogo.

Arishi küm 29 tain Germany nunger international asayar yagi Bundesliga champions den ya küm pezü atema tenangzüktepba ka yangluogo.

"Ni Bayern nung densemba atema pelar," ta Tah-i ashi.

"Ni idaki kü khuret agizüka anogoshia meranga inyakner, aji ta asünungdang onok team ka ama takok nung aotsü aser takok maroktem koktetsü," ta paisa shisem.

Tah season 10 tashi Leverkusen nungi asaya aser iba mapang 2023-24 season nung manager Xabi Alonso lenisuba nung Bundesliga aser

Kasa mapang nung taoba küm August ita German Super Cup final nung penalty metsütepba sülen Stuttgart akokba Alonso-i aiba team nunga pa densema liasü.

Leverkusen den tenangzüktepba meyanglushitsü atema telemtetba agiba sülen pa Premier League nungi Liverpool, Manchester United aser Tottenham Hotspur aser La Liga nunga Barcelona aser Real Madrid na den sendaktepa aruogo.

Ahisüaja pai Vincent Kompany-i aniba Bayern team nung denogo. Bayern nungi defender Eric Dier iba ita tetenzüklen Ligue 1 club Monaco nung oa denogo.

"Tah ya tajangshiba aika bener aliba international asayar ka aser pa onok defence nung amenoka asayatsü atema mapang magitsü," ta Bayern sporting director Christoph Freund-i ashi.

2018 küm mezüngbuba international jenjang nung asayaba sülen Tah ya Germany team nungi 35 ben asayar lir.

Pa ya Nations League nung Portugal den semifinal asayatsü aliba head coach Julian Nagelsmann-i aniba Germany team nunga densema lir. Iba asaya akoker ya France mesüra Spain den final asayatsü.

Bayern-i 2024-25 German Bundesliga title benogo aser parnok tanabuba jenjang nung tembangba Leverkusen team dang nungi point 13 agi timba liasü.

French Open: Bopanna & Balaji na tanabuba round-i iogo



Monupii/May 29, 2025

(Agencies): Rohan Bopanna aser N Sriram Balaji na tang asaya aliba French Open nung pei tarep den kulemi tebur tarep asaya nung tanabuba round-i iogo.

Tena tanabuba round-i aiba sülen taküm iba asayamung nung India nunger tebur tarep asayar asembuba tanabuba round-i iogo.

Bopanna aser pa indang Czech partner Adam Pavlasek nati America nunger tarep Robert Cash aser JJ Tracy na 7-6(8), 5-7, 6-1 agi koka tanabuba round tongtetogo.

Tenati break points pezü tashi anguba melalui agitet, aser first serve points shilem 68 koka liasü, ajisüaka asaya akoktsü atema tezüba masü asü aser tenati ghonda ana ser minute 11 asayaba sülenang asaya koka liasü.

Ajisüaka Balaji aser pa indang Mexico nunger partner Taoba mapang Yuki Bhambri aser pa indang America nunger partner Robert Galloway nati 6-3, 6-7(8), 6-3 agi Robin Haase aser Hendrik Jebens na koker liasü.

AFC U23 Asian Cup Qualifiers nung India team Group H nung ata lir

Monupii/May 29, 2025

(Agencies): AFC U23 Asian Cup Qualifiers nung India U23 tebur football team hosts Qatar, Bahrain, aser Brunei Darussalam den Group H nung ata lir. Iba asayamung atema draw Brehostibarnü AFC House, Kuala Lumpur nung süla liasü.

Qatar nung Group H asayatem asayatsü, koba September 1 nungi 9 tashi asayatsü.

Team 44 telok 11 küma lemsaogo aser telok shia nung team pezü lir. Telok ajak nungi takoker aser runners-up team tajungtiba pezü AFC U23 Asian Cup nung asayatsü, koba Saudi Arabia nung 2026 küm January ita asayatsü lir.

India team Pot 3 nung liasü, koba lintük final rankings dak ajemdaker toktsür.

Indian U23 team ya head coach Naushad Moosa lenisuba nung asayatsü. Team ya June 1 nü nungi tenzüka Moosa lenisuba nung Kolkata nung training camp ka akatsü aser iba sülen friendly asaya ka ana

Group A: Jordan (Hosts), Turkmenistan, Chinese Taipei, Bhutan

Group B: Japan, Kuwait, Myanmar (H), Afghanistan

Group C: Vietnam (H), Yemen, Singapore, Bangladesh

Group D: Australia, China (H), Timor-Leste, Northern Mariana Islands

Group E: Uzbekistan, Palestine, Kyrgyz Republic (H), Sri Lanka

Group F: Thailand (H), Malaysia, Lebanon, Mongolia

Group G: Iraq, Cambodia (H), Oman, Pakistan

Group H: Qatar (H), Bahrain, India, Brunei Darussalam

Group I: United Arab Emirates (H), IR Iran, Hong Kong China, Guam

Group J: Korea Republic, Indonesia (H), Laos, Macau

Group K: Tajikistan, Syria, Philippines, Nepal.

BILEMDANGANG

"Tenzükshitsü atema tsübua teli."